

四庫全書

集部

欽定四庫全書

清容居士集卷三十二

元 袁桷 撰

行狀

翰林學士嘉議大夫知制誥同修國史趙公行  
狀

曾祖伯洙宋朝請大夫知南外宗正事贈金

紫光祿大夫

祖師雍宋朝議大夫直寶章閣考希聖宋宣  
教郎史館校勘

公諱與愚字晦叔宋燕懿王德昭九世孫高祖子英宗  
正少卿避地南徙紹興間為台州黃巖丞家于縣之西橋  
至其子孫遺育蕃衍故今號西橋趙氏宗正有孫師淵  
字幾道官至太常丞為朱文公高弟文公述通鑑綱目  
條分例舉整齊芟蕪迄于成書皆太常所定其言理學  
蘊奧心受耳屬精析該邃非若語錄所傳剽臆謬妄東

南後進咸尊太常與黃榦氏並於公為伯祖公少美儀  
觀音吐清徹讀經史大義必本家訓弱冠以易入宗學  
登咸淳辛未進士第用積舍法教授郢州郢為楚上流  
歲備武不懈公視邊將翫弛而咸淳士大夫率恥言邊  
事迺策諸生而問曰文武之用不可偏廢韓范二公不  
以言武而失文曹彬狄青不以清談而喪武文事武備  
豫然後立時未幾王師絕江守以城獻公自念為宋國  
族鄂先內附兵勢若破竹不可支而歸道已斷絕不得

返遂上書丞相伯顏公言宋權臣賈某柄國十有五年  
脅威固主棄背信好事一至爾今得奠如藩臣歲奉貢  
幣願緩師以行成焉書未報而錢塘已下實至元十三  
年也公知南北已混復上書丐返田里會大臣有竒公  
狀貌告于世祖皇帝十四年遣使上驛來京師幅巾深  
衣見於上京天子清問溫渥首詢其老幼及江上事首  
尾其對復如上書所言特命給廩餼以俟用明年奏言  
江南郡縣戶口繁夥當以簡易治近歲有司急切興利

殊失安輯新定之意臣生長江南悉習利害因條類為  
十六事以進大較以擇守令釋征歛厚風俗為急而未  
復以存活趙宗為請十六年入翰林為待制陞直學士  
復兼集賢又三年遷侍講學士預纂實錄加太中大夫  
於是侍講十四年矣累疏乞致事歸里雖未得旨而不  
入翰林者幾二年久之拜翰林學士自鄂之來京師凡  
二十有七載由里居而之鄂也適三十年每恨乖隔愈  
久冀一得請以終老丘壠常忽忽不樂秋風倚檻懷悲

故鄉擁衾障袂聲出金石非復以宦達為可戀惜而志迄不遂抱疾暮歲以卒大德七年正月二十有二日也年六十有二積官至嘉議大夫公之為侍講也言江以南括責營聚皆大臣與其黨類私植貨累鉅萬願寬今年田租以緩赤子宋世陵寢毀掘及移徙故宗室大姓皆非初詔本旨乞正其私擅之罪天子以為然又言迺者庚寅歲大霧四起越翼日癸巳夜地震地為臣道臣強則震至正月甲辰西城老虎就擒虜於象為兎為金

其著尤異咎在奸臣竊權今已執咎而宸斷未果願蚤  
正天誅以應變異上意若微忤而終不以罪由是居家待  
罪閱三月大司徒公自上京俾燕只干學士諭以復職  
後平章政事不仄木復為公奏逋負歲積不能自養工  
曰得非指桑哥為庸者宜令有司計逋以償歲別給帛  
粟餘勿為例人益知世祖皇帝神武沉斷非真忤公公  
天性疎達與人交緩急高下盡力傾引弗避不為刻峭  
自高亦不復計得失成就故始爭趨慕而間輒棹去訖

無毫髮恨意傾觴煮茗費盡即止危坐清論一不以靡  
密缺乏廢其雅道歲時奠薦雖甚匱嗇猶豐絜盡力如  
舊禮自宗正四世而下皆請于朝而復其役族屬男女  
以及鄉里之俘虜而北來者悉贖以歸凡十一人有張  
生貨藥西闢一日過之張死已數月矣亟歸視藥券盡  
酬所負其家人不知也遂具以告而歸之一士人伺公  
錫賜時謾言當買田毫宿間計資與之歲久不至後亦  
不問其受欺類如此同列有侮公為方拙暨死之日朝

野咸曰善士已矣各賄奠哭弔終其歿事而同列亦悔  
昔日所侮為可愧往右丞許公仲平篤意道德性命之  
學奮自飭厲以文公四書為標準達官高胄皆俛首承  
訓不敢怠公時至京師首言力行致知近世率清曠自  
高言行若枘鑿不相入非先儒本旨許公深然之至觀  
其平居處身待人抑華養實許公雖死而昔時門人親  
聞其言者皆以為伊洛源委惟趙公為真倡益以知太  
常之學為可信至公為有傳矣有詩文若干卷類聚藏

于家初娶舒氏御史中丞亶之五世孫未踰年而卒歿  
塋中裝歸其婦翁不取今夫人史氏奉直大夫知連州  
一之之女生三男子長孟實以公居朝廷久特官為承  
事郎同知瑞安州事孟賚溫州蒙古學教授孟賢以廕  
入官孟實等欲求銘當世有道以信于後俾楠有述謹  
具歷官行事如右謹狀大德七年七月日從表姪具官  
表楠狀

推誠保德功臣閑府儀同三司太傅上柱國追

封薦國公謚忠哲梁公行狀

公諱德珪字伯溫姓梁氏大興路良鄉人八世祖德成  
遼末以勇力善背膂鄉里生子吉不仕吉子伯溫金皇  
統進士官通議大夫同知河南府事遂贈吉安定郡伯  
郡伯孫牧牧子陟明昌進士官中奉大夫同知南京路  
都轉運司事亦贈其父安定郡侯郡侯有別墅金世諸  
名士日觴詠從之游中奉髫年能以詞章相周旋咸器  
偉之晚歲直節善政深自植立值金亡終老於里生衍

為金承奉班祇候祇候生守信終隆興都轉運鹽使轉  
運生國禎終內藏庫提點是生公後以公為左丞時朝  
廷特號中奉曰通憲先生轉運贈榮祿大夫定國公謚  
忠毅提點贈榮祿大夫安定郡公謚僖敏公幼歲給事  
昭睿順聖皇后宮中奇其器骨俾熟國語通奏對年十  
一太府長官愛之帥其弟德瓚同見世祖命相者閱二  
兒相者曰後當貴帝領之遂使從東平忠獻王安童習  
憲令儀注年十四即襲父職至元十六年升中書左司

員外郎二十三年遷右司郎中踰年復左司二十六年  
進太中大夫總管大都等路打捕府仍領左司是歲復  
右司二十八年參議尚書省事復遷中書二十九年世  
祖特旨拜參知政事成宗即位陞中書左丞大德二年  
拜平章政事公未弱冠即官宮省踰三十年錢穀出入  
高下若指諸掌四方奏請率面授中書掾言某事當如  
律某當如先帝某年所行極邊宗王急驛調發卒無所  
從具同列拱手不能語公徐言軍用有故實泛索非故

事不可行執筆量創退考故籍無少訛誤戊子歲地震  
北京世祖問今歲刑部所報囚徒何頗多公對曰囚非  
犯罪罪特以徵索羅織無所從納故悉為囚在獄中上  
大感悟迺悉赦天下逋負京師供給繁夥屢奏蠲復之  
漕運根本江南浚治諸湖堤不宜使富民侵塞以殺水  
勢議自公始選部資歷吏不敢後先一時以事功自期  
者公亦與一二執政議超常格俾自効力大德初元成  
宗恭儉守成一繩祖武公亦以朝政自任年穀豐熟四

境寧謐廟堂大臣相戒以清淨為治凡上書言利害歛  
口不敢發自是希進者皆避匿後議相持既深朋聚比  
進乘事間發浸淫於疑似之際會上不豫遂出公湖廣  
安置踰年上疾稍瘳罪一二幸臣急召公還都遂乘驛  
朝于上京上問卿從何來公環視嗚咽不敢對上賜酒  
饌命歸省其母諭以將再用至九月詔復入中書時公  
已得上氣疾與家人言向嘗遠謫今得再覲上明白母  
子相完聚即死且不恨何敢復有希進意遂却藥危坐

謝事某日星殞西南有光流空中是夕薨年四十有六  
葬于宛平之樊村妻安氏今封薊國夫人柔靜能家子  
一人某女三長適納逮刺僉事次適伯達某路都提舉  
幼適某同知宣徽院今上改元詔錄勲舊贈公推誠保  
德功臣開府儀同三司太傅上柱國追封薊國公謚忠  
哲而公祖父亦復追命為國公母夫人完顏氏公能承  
侍盡道待二弟曲致恩意對賓客謙不失禮自以先謀  
踵世科尤重儒士詢考安定別墅為圖表章一時搢紳

咸賦詠追美其事侍帝左右率僕候意嚮獎拔士類至  
於決事占奏憤歎不讓而悉簡慤稱上意死雖十餘年  
朝廷至今猶稱道之前翰林修撰知高郵府張某次公  
遺事命桷演潤將求鴻藻以表墓道桷與張侯曩同在  
翰林見一時行事張侯以親嫌為辭公之弟德璋今益  
都總管昔為慶元判官時桷居鄉里得聆公言行遂不  
敢以草野為辭然舊聞中原故老嘗言梁斗南文采風  
度有陶靖節晚歲志意後進爭慕企久知迺通憲先生

也先生言行在人口不絕方金將亡時士族解散漸盡暨獲平定推原高曾名字於荒碑野塚之際皆缺軼無所考獨梁公八世官簿歷歷可据德源深長通憲守儒之效著矣至若公行事在史冊者不敢有私姑次其出處大致使銘述者有考焉延祐三年九月某日翰林待制承務郎兼國史院編修官袁桷狀

翰林承旨王公請謚事狀

公諱搢字肯堂世居濰州家譜云與中書令同系八世

祖某宋世為司農卿守鄆因家焉故今為東平人曾祖某金進士奉訓大夫滄州無棣令祖某以公貴贈正奉大夫太常大卿考某贈昭文館大學士資德大夫公幼歲肄業郡學試詞賦入等杜先生仁傑深器之賈文正公居貞一見館以教其子載與來京師時太保劉文正公王文康公王文忠公特薦士權即辟為權國史院編修官丞相史公耶律公在政府聽公上事言論接以賓禮耶律公復戒其子以兄禮事焉至元二十一年授將

仕郎命為真于時集議時政必使公預會裁酌之十二年丞相伯顏出師諭江南公實草詔是歲渡江世祖命翰林直學士李槃與公偕行俾蒐擇儒藝之士明年春次杭州公見董壽公具曰故宋圖籍禮器具在宜收其祕書省天章閣翰林太常考集目錄宋史異日必修纂遂患輦歸于朝十四年充應奉翰林文字公辭曰少嘗受學于李先生謙今先生猶教授東平實不敢先遂以其官名李明年始受之十六年陞修撰凡制誥撰述文

康公必以命公丞相齊魯國公和禮霍綠領翰林開司  
徒府授府司直世祖詔大臣議道藏可焚棄者公與議  
完救之十九年丞相阿合馬敗齊公入相議選舉更定  
法皆公手定遂被吏部郎中未幾改禮部後復吏部而  
翰林制誥猶諉公叅詳焉二十二年遷太常少卿上方  
定宗廟修禮樂而公昔從故宋所輦還者皆得補缺二  
十四年出為江北淮東道提刑按察副使御史大夫率  
公陞辭上賜酒慰遣擊奸惠民淮民猶能言其事二十

七年除治書侍御史故相桑哥嫉公命與故平章魯公  
卜忽木檢責燕南逋負公先馳驛會計簿領迄無所迎  
合謂魯公曰公近臣某復在言路相若竒責當受罪不  
以累公也未幾桑哥伏罪二十八年調選江西二十九  
年改翰林侍講學士三十一年世祖升遐成宗嗣位分  
院上都制誥多公次定徽仁裕聖皇太后知之特賜楮  
幣七千五百復命撰世祖祔廟謚冊攝司徒以導禮大  
德改元纂修世祖實錄陞翰林學士二年參議中書省

事右丞相引見于柳林上問昔從何人丞相奏是和禮  
霍孫官屬真儒者昔奉旨參用儒生今故用之時上初  
即位勵精文治年穀屢熟海內熙洽公從容二相間以  
薦士安靜為急務後數年來執政希合生事將檢括增  
羨首以其策行東南公卒不肯附稱疾納祿幾一年七  
年朝廷更政獨公無所累歸里九年授濟南總管禮法  
自持嚴而不苛凡為民害者悉除去丞相荅刺罕見公  
所申牘咸從之十一年太師瀋陽王等奏俾乘驛造朝

拜翰林學士承旨復修兩朝實錄特命贈公二代公言  
臣本儒家遭逢四朝先世皆潛德里士大國美謚懼無  
以稱以臣所居官授之誠以為過今羣臣封謚下太常  
必繇翰林議官品臣首踰越將無以服衆今上時為皇  
太子嘗詢翰林老成必首姚燧王構手以酒賜之是歲  
尊謚祖宗公撰太祖睿宗皇后謚冊賜楮幣萬緡正月  
撰皇后冊文攝侍中讀冊至大三年以疾薨公在朝廷  
踰四十年凡累朝憲章損益能悉舉源委翰林述作自

為編修時已預撰先賢文懿尊酒敘論咸有据依欲輯  
為臺閣舊聞而事莫遂索拔後進雖未識面汲汲稱許  
不絕口性剛直有不善必面責之有文集三十卷藏于  
家子士熙今為翰林待制竊惟聖朝褒錄臣下見於令  
典謹摭其居官行事請於太史上於太常至若居家雜  
儀治民遺事悉弗敢次第延祐三年九月日門生翰林  
待制承務郎兼國史院編修官袁桷上

李司徒行述代作

嗚呼我先公之亡銓時年十有三遺言懿範誠不盡知  
雖知之亦不能盡詳少鞠于趙氏外家外大父諱某為  
南京同知先夫人嘗泣語銓曰汝父沉靜寡言笑篤志  
嗜古卓然遵聖賢言行為矩範強之仕弗肯仕凝塵敗  
席家事靡密弗顧疾革猶執卷瞠然若有思空約彌甚  
間嘗曰我幼孤長兄樞密都事教我撫我繫汝舅之訓  
汝舅生三子長都事君從革次總判君從謙余叙為季  
生兵革中我先君每誨吾兄曰家世朔州罹亂離朝夕

習騎射今邊宇寧謐諸兒宜守儒顯親母刻木吏為也  
都事受其言朝夕以詔二弟俾從學于九山李先生徵  
吾詎願不仕非其道不可也銓幼不能必其成後其語  
諸又曰大父之墓在朔州地遠不能至考其事則有紫  
陽楊先生之誌在戒具母忘焉不幸某歲卒年四十有  
一葬于南城柳村之原先公既卒家益困太夫人挈子  
外家化治銖粟率資以教銓稍長痛自感勵有以其名  
聞于世祖皇帝詔習儒業入國子學師許文正公馬後

直省閩三年出為彰德鐵冶提舉又十年同知歸德府  
事始得致養于母夫人元貞元年過汴梁將歸京師不  
幸夫人卒於汴卒時年五十有八奉柩歸葬于柳村相  
其地水齧洳不可旁祔迺卜於西山金河口田峪之南  
得合葬焉冬十有一月某日也元貞元年為翰林待制  
又三年轉廣平等處鐵冶提舉改工部員外郎承檄視  
屯田鴈門鴈門地近朔州銓恩念吾大父葬朔州在鄆  
陽灰河西一里今六十年榛莽不可攷有楊先生英誌

在雖無能知吾以誠求寧卒使無知哉翼日驗誌徵旁  
近卒無有哭走于野有老叟年八十餘迺來曰李府君  
墓時吾嘗治畚鍤于灰河今西一里隆然者其墓也銓  
泣且拜得封崇以識焉楊先生之誌曰李君大父諱彥  
宏由彥為名者十八人自彥而別為玉者二十六人其  
諱祀者銓大父也我先考大父之幼子也都事有子曰  
某總判君無後銓由是奉都事而下皆合葬于西山而  
灰河之墓始樹楊先生之碑旌大父燾後之德遭時隆

平非若昔時之永隔歲時省墓則力猶可至也楊先生  
之誌又曰大父為山西西路課稅時耳目所逮纖悉必  
陳於長官有以榷麌年利即峻拒絕後患或言郡縣始  
安輯宜用重典使不犯輒面折陳白非忠厚恤民本旨  
先公之誌翰林承旨王先生構則曰拱璧駟馬流俗所  
恃嬪者先公無是心也銓無所肖似自工部改授朝列  
大夫揚州路同知臺櫂為監察御史四年少中大夫河  
北河南道肅政副使五年移淮東未幾嘉議大夫常州

路總管不六月召為叅議中書省事又六月除禮部尚  
書復五月轉燕南河北道肅政廉訪使改昭文館大學  
士中奉大夫治書侍御史今上皇帝推賚存歿於是得  
贈大父資善大夫司農卿上護軍追封真國公謚莊順  
祖妣王氏真國夫人考榮祿大夫司徒上柱國追封真  
國公謚端敏妣趙氏真國夫人嗚呼銓無所肖似承藉  
先德先夫人之訓歷歷在耳願因朝廷光顯之寵求文  
鉅公表於墓道俾李氏子孫後有攸考謹再拜叙其事

于右端敏公諱從益銓今為翰林侍講學士娶孫氏封  
奠邸夫人合三房孫凡幾人長某延祐四年九月日男  
翰林侍講學士中奉大夫知制誥同修國史李銓狀

資德大夫大都留守領少府監事兼武衛親軍

都指揮使知大都屯田事贈推忠贊治功臣銀

青榮祿大夫平章政事澤國公謚忠宣鄭公行

狀

本貫澤州陽城縣澤陽鄉屯城里年四十七

曾祖珪不仕

祖臯故忠昌軍節度使

父鼎故鎮國上將軍湖北道宣慰使贈銀青  
榮祿大夫中書右丞謚忠毅

公諱制宜字扶威澤州陽城縣人大父節度當金危亡  
時以智略慷慨衛極里社興屯田陂池之利年不展用  
是生忠毅公提天師勦羌蜀絕襄漢奇勲冠勇功次表  
燁官譜始著公忠毅公之嫡子也方勝衣時忠毅攜見

世祖皇帝特視偉之命從大臣習給事儀忠毅遏寇死難世祖震悼迺即授金符襲平陽太原之軍而戍鄂馬公盛年受殊數益矜謹自重控伏將士怙首無撓犯湖廣行中書治鄂戎帥策馬進退承教令縮威不自給獨公爭器重傾下鄂守缺長執政俾攝治日坐決文武兩府郡益以理凡數歲訖不除鄂長官十九年詔治樓船有事於島夷江濱地不足居船官城南有河家洲洲乘廣多居民中書行令遷洲屋仆撤墉瓦聲湧撼白日交

走驚泣道上公行相旁近地與洲無異即趣還其居洲  
民爭持牢醴拱謝公裨手曰安民吾職也何謝焉鄂多  
火災連晝夜交作或言城中隱姦利羅疑似者急治火  
可止公言咎在火政不明火未絕而復誣構彼何生為  
遂率軍士申令約立渠巷俟火所未至通徹其道火是  
日迺止有盜私立部號伏近郊日暮剽劫負擔者訛言  
將入城索之不得見數男子從城外來促數異顧命縛  
之省貴人曰得無以疑詐誤將出之明日過城東門見

一少年乘白馬行且色動公呼曰汝賊也汝貌良人也  
何作賊不速言當訊汝少年叩首吐實復信宿日所捕  
亦同款一郡大驚二十三年徵入侍中明年從駕北征  
願前敵效擊上曰鄭制宜死唯一子在宜勿使擊復請  
戰乃命從太師以行師還詔侍膳殿中加懷遠大將軍  
樞密院判官春駕如上京院留母行公曰年少宜服勞  
願以偕行上愛而勿許二十八年超拜湖廣省叅知政  
事是時鄂大臣集括歛為奇功上怒錄其家公入辭上

曰而父死賊難賞不及于汝今有盜臣貲財僅孥留貯  
于鄂者宜擇精善自取公對言某臣家入皆贓穢不可  
詰受之雖無汙然跡其由來寧無汙乎上益奇之鄂為  
舊治土俗厚薄悉周知其隱蘇枯翦彊翕然至和上知  
其能賜中金五千兩間歲具口奏臣向留鄂治兵臣母  
知臣年未更事乞臣侍陛下宿衛今不以卑鄙預外政  
府朝夕思念不勝任敢昧死以請復徵為內臺侍御史  
安西地歲牧馬牧人利曠遠率併入旁近世業民數訴

理求地持軋不下命公乘急傳治其事覈地得三十萬頃考籍于官餘悉歸于民三十一年拜行樞密院副使院治衡州公統軍入衡下令不得入盧舍營部擇便地定井竈食罷畢發至暮整列就次道遇雨卒言宜止頓舍休憩公立雨指畫訖一卒無敢宿民居道旁市井人雜語不知為官軍也湖南地介江廣賊負險煽昭賀聯絡廬陵諸屬邑大軍至即守固不復出歲一捕寇率害善地寇伺去復嘯集如故公至相院塞雜耕守戍據其

出沒明語歸降者釋弗殺遂殲其酋長茶賊譚計龍匿  
兵器有異志立捕得之其弟昇貨以緩事公趣輸于軍  
卒正其罪成宗皇帝改元復別置副使一人與公同治  
公謂官溢常員先置者當罷入授大都留守領少府監  
未幾兼武衛親軍都指揮使知大都屯田始進階資德  
大夫公幼熟內府營繕工巧供給祠祭之屬能通達緩  
急終歲事集無曠敗至大宴席刀匕樽筭必命公董領  
以重其事大德七年地震太原平陽公承命往視且言

河東濯鉅創聖天子出粟幣以賑活之設一不及是負  
明詔死罪萬萬何可逭迺躬入里巷傷殘羸餒悉疏錄  
以給有市官利征商詭言某地少災不宜費官廩征法  
宜如昔無所損公怒曰幸災困民民何罪且汝計征入  
何補縣官入言于上復其地三年公天性慤厚上宴大  
明殿獨侍立不惰命之飲再拜辭上察其意賜酒二壺  
使歸飲于家事母蘇氏至孝特封潞國太夫人以寵之  
錫賚無虛歲復加賜海青俾入禁園尤號為異數大德

十年二月五日以疾薨年四十有七其墓在具縣具鄉  
自公少時已知自貴乞名於王文忠公王見而器之遂  
定其名字忠毅以死事顯故公彌欲以忠孝勉獎通敏  
有持守其居郢十年善政藹著至今父老言鄭公真清  
士非他人比至守官靖正不以喜怒害事謙抑自晦中  
朝士大夫則曰鄭公真吉士也配可烈真氏丞相寧羅  
公之女子鈞今為懷遠大將軍武衛親軍都指揮使至  
大更元特贈推忠贊治功臣銀青榮祿大夫平章政事

澤國公復下太常定謚曰忠宣謹具歷官行事鵠筆碩  
彥得以取擇謹狀

榮祿大夫大司徒特封饒國公吳公行述

本貫饒州安仁縣開興鄉壽樂里

公諱克已字祥甫維吳氏遠有令緒泰伯以至德讓嗣  
逃于吳周受殷命大封同姓而泰伯胤系因食采吳地  
子爵不絕周既衰吳越楚爭王吳為越所債子孫散處  
江湖間因以國氏夫差六世孫芮為秦番令有德于番

號番君漢次芮功封長沙而廟食番世不絕宗庶蕃衍  
凡占籍番者悉祖之安仁吳世儒家宋淳熙間有從朱  
文公講學曰某皆其譜謀公之曾祖岳祖夢旂養潛樂  
幽丘園晏如也父鑑服儒業言行矩範閭里是否能持  
平善諭俾率初後皆尊信之幼書教予誨之曰學非以  
干祿遇不遇命也故公受其訓而行之幼靜默寡嗜好  
達生養和非仁義之言不言其居家也斥絕喜愠躬行  
以導之不逮者微語以警之其處于鄉也肅然如有容

暴者化之以慈有為不善者輒自勵曰得無吳公知吾所為乎幼督之以學壯獎之以仕稍有能輒譽之其成就也怡色若已得年益耆賓客造戶無惰媿酒至愈莊夜分猶危坐治纖愚人皆曰吳公有子全節為玄教嗣師總攝江淮荆襄道教崇文弘道玄德真人其好賢其持身常念若不及繫家教所致雅公之德視其子則猶可企也延祐六年五月玄德扈駕上京桶以待罪集賢偕行公薨以五月丙辰訃至玄德晝夜哭不絕泣且曰

全節不天疾驅以歸願述先公之行以聲其哀稱謝曰  
述德叙行宜在門人佐吏敢辭又曰猶子善辱與予游  
其何辭謹按玄德真人幼慕老子道年二十從大宗師  
開府張公入朝奉祠宮間歲告歸省成宗皇帝憫許之  
大德八年公與夫人壽七十上賜公上尊加帛俾乘傳  
以歸大德十一年特拜翰林學士中順大夫至大三年  
武宗皇帝隆孝治恩賚中外臣子繇是超拜榮祿大夫  
司徒饒國公配舒氏饒國夫人而公考亦追贈昭文館

大學士資善大夫饒國公謚文靖妣陳氏饒國夫人玄  
德奉制書以歸延祐元年公壽八十天子遵成宗錫賜  
如故事延祐四年復降璽書復其家命守臣王都中表  
鄉曰榮祿里曰具慶玄德墓公所居堂曰晚香曰天爵  
翰林侍讀學士元公明善記之矣曰齊老則因宋孝宗  
所書扁以徵其實曰樵隱公所居自號以寓其冲澹之  
意馬公壽八十有五將以某月某日葬于鄉之山田原  
子四人長詢次誠姁次玄德真人次全義女若干人

孫男若干人善集賢修撰蒙剛才致孫女若干人曾孫  
男女若干人始善來京師從游嘗出大父手書誠善制  
酒力纂述勿喝玩以自棄又誠其叔父持敬存誠為應  
天事神之本日承君師母以我羹為辭幸未棄昭代嘗  
惕然深念曷報稱數數道途非所望假我死何憾也水  
塞於山屈曲演迤遇順而始達非偶然也養深用嗇累  
遠益振於吳氏有考世胄顛覆抑其所發者誠過耶嗚  
呼吾於是見之矣桷也辱再世之游耳受目矚向為史

官錫命享醴之禮嚴詳於記註惇史純孝贊皇風闡鴻  
藻有自來矣遂不克讓奉于太史俾有考焉延祐六年  
七月日具官表摘述

清容居士集卷三十二

欽定四庫全書

清容居士集卷三十三

元 素楠 撰

表誌

西山阡表

嗚呼我大父嚴州宋寶祐五年丁巳六月七日庚寅即世年六十有七後六十有七年是為皇元至治三年歲在癸亥聖天子推恩文武錫命有秩不肖孫楠以從臣

遂得贈中順大夫上騎都尉會稽郡伯大母令人王氏  
會稽郡君是歲五月丞相忠獻王薦于英宗超拜侍講  
學士泰定元年又贈嘉議大夫禮部尚書上輕車都尉  
會稽郡侯郡君加會稽郡夫人嗚呼桷生七日而母史  
夫人卒先考處州嘗語曰汝外祖敷文轉運公諱賓之  
淳祐十一年辛亥歲秋八月病且革嚴州調疾候所命  
于時汝母年六歲余年七歲即指曰吾女以中外表願  
奉公幼子大父謝且立曰幼子獲為越忠定王孫婿他

日生孫寧負吾兩門哉桷泣受其語以識桷髻亂時喜  
聞遺事于時越公賓客子孫宦途著仕而大父遊從咸  
在嘗語曰越公為京尹十有一年擿括隱伏抑強振惠  
繫汝大父密以贊外若革布使世不知有子弟名字其  
居越公喪盡喪禮喪除廬于墓不入城府者三年匪惟  
鄉人言之外州士大夫能言之退考于家乘曰初補承  
務郎監無為縣襄安鎮知建寧府浦城縣丞越公久侍  
從陞政府而執政子求外仕令不許故再任佑神觀紹

定四年越公解機政始得授江南東路安撫司幹辦公事端平二年以侍養請于朝優許之充沿海制置司機宜文字淳祐七年通判嘉興兼尚書省提領田事所檢閱迺曰吾得以仕矣治府事無留難因以空悉以越公尹京法治之郡守謝不能提領戶部財用史宅之悉括諸司田阿媚奉上具籍百餘萬用戶部印入御府而以副帙置三省始愀然曰吾不可復治乞歸三年授江陰軍力辭以疾後戶部果督責浙西諸州虛籍守臣爭

納告丐罷言諸司田皆朝廷舊籍欲入虛籍則宜蠲舊  
籍未幾寃之死始悔罷而副帙在三省者國亡散落民  
間吉利大臣深信之卒為東南害十一年知嚴州寶祐  
二年提舉台州崇道觀積官至中散大夫鄞縣開國子  
先處州登朝贈中奉大夫再以登極恩贈中大夫維我  
大父訓範嚴密居家治具畢舉區別工技悉精其能堂  
奧危坐無笑色聚書至數萬卷圖畫鼎彝鑒裁得源委  
而先處州遵奉誠令教子晝夜不廢桷得以謫薄文藝

敘升翰苑幾二十年再為集賢直學士今復超進為翰  
林侍講學士夙昔期望於遺言見之今墓在桃源之西  
山王氏夫人合葬焉大父諱似道字子淵曾祖諱臯累  
贈太保妣楊氏越國夫人楊氏魯國夫人祖諱昇累贈  
太師衛國公妣楊氏齊國夫人考諱韶少傅同知樞密  
院事資政殿大學士累贈太師越國公妣陳氏周國夫  
人配王氏平江府吳江縣癯庵先生份之四世孫蘇養  
直向伯恭張安國朱元晦諸賢賦詩于其家圃有詩集

十卷行於世長子諱浚奉議郎淮西制置司機宜文字  
入皇元改授承務郎賓州同知娶史氏孫四曰棟棟棟  
棟孫女十曾孫五彥毅亨端辛孫女一先處州諱洪朝  
列大夫同知處州路總管府事贈中奉大夫浙東道宣  
慰使都元帥護軍會稽郡公娶史氏楊氏並追封會稽  
郡夫人子楠為嫡長孫女三曾孫二瑾瑾女四人四世  
孫男曨曨女德秀袁為鄞聞姓晉政府繇越公始至于  
大父承緒展世不赫赫以求高命所居堂曰拙逸曰得

間殆見其雅志將以俟于後矣夫德厚者報深情報自  
佚必不能以顯郡公事兄若父讓爵避財鄉黨至今能  
言惴慄四十年而教子督功則曰我大父之訓我不敢  
私今雖未底于成詩書之澤殆能以自白歲月逾邁交  
友故吏漸落幾盡隧碑有缺幾於無傳是則有罪矧以  
不腆之文行于南北庸述祖德刻于墓道俾子孫有考  
泰定元年歲次甲子某月某日孫具官桷表

先大夫行述

先大夫諱淇字季源姓袁氏袁為明州著姓州陞為慶  
元宋仁宗朝詔外郡得籍開封舉進士嘉祐初為開封  
舉首者諱穀後通判杭州蘇文忠公時為郡太守日論  
文史典處州以終贈光祿大夫其宗諱穀亦占籍開封  
試進士歷官至祥符縣丞因家焉為公六世祖五世祖  
諱謂贈少保高祖諱臯贈太保靖康難作隨青州兵復  
歸里積善好施年八十餘預言死期別親黨沐浴端坐  
以逝曾祖諱昇為明州助教贈太師衛國公樹德力卑

讓鄉里尊信郡有不軌大獄命公攝治即其家搜驗得  
偽署籍姓名一千餘人皆六縣大家不以逞官立焚之  
異行遺事世多所傳錄妣楊氏封太恭人贈齊國夫人  
祖諱韶幼學于族父正獻公變登淳熙丁未第嘉泰禁  
道學自趙忠定以下皆入黨正獻公坐廢越公為吳江  
丞得罪蘇師旦俱家居避禍嘉定改元褒叙趙忠定公  
朱文公於是相次被召先後為侍從摺紳榮之尹臨安  
十年神明愷悌自辛棄疾揚王休馬大同丘密以後推

公次之為同知樞密院事以資政殿大學士銀青光祿大夫奉化郡開國公致仕贈太師越國公妣陳氏吉國太夫人贈周國夫人考諱似道中散大夫知嚴州總覈事物能通達損益然不樂仕進守次江陰將行乞祠祿以歸理宗異之贈中大夫妣王氏恭人贈令人公嚴州次子七歲能諷誦詩書左氏通大義以越公遺表恩奏補承務郎年十七試吏部銓監鎮江府大軍倉明年道臨安馬光祖以樞密為京尹上書往見之馬公喜謂曰

是故袁越公孫耶光祖治京師皆先公條教今官位適  
相同然貴家諸郎多不達文墨是書果子所作當留以  
自近公謝不敢遂改辟監桃源酒庫檄入帥幕時馬公  
號嚴敏客多畏避不敢進率秉燭決諸曹事命四客坐  
四隅禁私語夜分間以成案俾閱先後是否一日擇卷  
牘繁冗者以試公公疏其要領言是事曲直微有隱某  
官所擬微兩端馬公大喜日以不決事委處分將俾徵  
旁邑逋負公謝曰初入官而以括責稱懼失先公遺訓

馬公謝之禮部尚書李公伯玉薦可治劇邑中書舍人  
劉公震孫薦可理濟縣馬公去國改兩浙轉運司幹辦  
公事轉運使胡太初刻峭善伺時相意旨公不樂之請  
告歸里胡亟怒以綠匣檄還司署曰不即來當議劾公  
起視事或咎之迺慰曰太初先予先樞密門下士知予  
能官固若是後潛說友為轉運檄督寧國絹十六萬疋  
公婉謝曰嘉熙以來江東稅絹皆虛負實籍寧國尤甚  
莫若悉蠲虛名止取景定至今年逋且昔時嘗以不能

謝馬公矣說友懼蠲數廣亟命他吏然卒不能辦為禮  
部貢院封彌官甫出院度宗忽降手札諭賈相曰舒津  
太學名士袁洪嘉定名臣孫宜興陞擢差遣舒同里人  
賈疑有內援遂除舒太常博士公為太社令就職兩月  
諷門下省論而舒亦以他事去賈相嘗曰浙東唯溫處  
士可任事四明士不宜用于時高公衡孫趙公汝楨以  
戶部侍郎汪之林以汀州陸合以軍器少監章士元以  
太常少卿趙孟傳以贛州合執政官至守倅凡六十餘

人皆家居月為一集約討論先哲言行不得議時事繇  
是公益得紬繹文獻深愛重自晦絕不逼京師書問賈  
相悉偵知之迺命主管華州雲臺觀咸淳壬申遷通判  
建康府公閱事敏決老吏不敢給慮獄句容有偽楮連  
坐二百餘人悉出之定議止誅其首帥趙潛貴驟不親  
庶務僚屬上府謁不得入率用紫袋取畫諾公坐賓次  
命吏白帥今邊事益急惡少年掠奪市上將騎不習兵  
非紫袋可奉行帥聞即延入閣出遜語且曰將循視沿

江諸屯壘苟可安便者毋忌也甲戌冬十有二月帥行  
郡中大驚爭移徙出郭而村落民與故侯聯絡者復入  
城有約白晝罷市公詢扇亂者斬之戒門者毋納村民  
城中始安夜多火災有徼卒瞻對詳練公私以白金立  
署賊曹一夕卒馳報有賊約以二鼓縱火東門劫門鑰  
以出今賊俱在廟中治火具公遣卒往伺賊將出廟門  
捕二人有縕火在手即斬以徇諸將留城者皆故侯部  
落至是益蹇傲願習射求官賞且曰在昔唯陳招捕習

騎射今不能復見此等相公矣翼日將巡城請公乘騎  
吏擇馴馬以進公命取將馬來將異之坐城上召諸將  
曰郡庫非制置使不敢用若等求較射吾當以私財定  
高下語畢入射將挾矢前喏曰願奉約束然不敢先公  
手弓遂弦三發皆中革一入的將謝不敢公強之終不  
能並卒定其賞如初諸將前曰惜侍郎官晚然事不可  
為公嘿然侍郎蓋江淮間幕府通稱也二月帥調精銳  
居屯江城中羸卒數百相偶語有卒夜從江滸還言趙

制置已南遁數日將解兵還淮西總領費伯恭棄軍資  
夜乘舟如通州入海賈相師潰歸揚州諸將率故侯部  
落將劫公出城公不得已微服間道歸臨安見太常丞  
吳浚浚舊為沿江參議與公厚善相對各泣下公曰國  
勢日蹙諸將率聞風內叛浚薦丞相陳宜中將留用之  
公願自効待罪急辭去趙公孟傅尹臨安奏為浙西安  
撫使機宜文字不拜趙公制置慶元復奏為沿海制置  
司參議官公時已陞階朝奉郎亦不拜乙亥冬臨安奉表

降謝太后詔諭東浙諸郡如命戒毋徒以百姓汙鋒鏑  
時入南軍道上虞餘姚焚掠以行聲言留軍慶元備禦  
居無何王師將壓境公見趙制置言南軍以具海舟實  
無意留旦夕必入城縱火當先攻甬東門宜戒火政分  
卒保東城以全居民未幾果縱火焚浮橋劫江滸城有  
備不得入舟出定海以行制置司改宣撫司復署為叅  
議人心危疑旁郡邑相屯堡未散舊不快意於衣冠者  
爭工變入爵叅議官陳允平素與王姓讐讐言新從福

州航海來見陳參議為書蘓都統約以九月乘驅下慶元當出兵以迎又言禮部尚書高衡孫而下三十餘人皆聯署勸進時張元帥督師將征南命招討使王世強圍捕鞠實公儒服立庭下見王辨陳參議與聯署書實亡有招討故為宋官寧知讐不為虛言王未應有戎服長髯者將登階見公亟下拜持抱曰此吾表侍郎詣王前曰傅海舊為建康壕寨官承宣使阮思聰與侍郎巡城議立木柵阮言城廣不可守且木柵無所從得傅海

答曰蔣山左右巨木可取撤近郊居民屋高下附益可立具使果欲守良無難阮故呂太尉姻盛怒將以軍律抗對殺海袁侍郎悟旨急叱海入獄明日杖海而遣之今不知侍郎何故立庭下海願以身贖罪王大驚具賓禮以迎且告元帥帥引問之故公言安反側定新國當絕告訐羅織翼日元帥盛軍容坐府有告者復言奉化昌國某大家以故王為名一從台州黃巖來一從海上來帥立叱去之陳參議亦繇是得脫郡大疫具善藥以

施死者給棺以殯後戒以為常行之踰二十年至元十五年從趙公朝京師覲世祖皇帝天語命班秩宜高從行者一等將授總管以子幼辭迺授朝列大夫同知邵武路總管府事以疾不赴至元二十年授溫州路同知疾作復辭公幼從王先生鑄學問戒以躬行為持身本每授以言行編諸書公守而行之至是書陶靖節詩顏氏家訓為一編以寄意至元丙戌歲侍御史程公奉詔徵士首寄聲起公公遜謝不敢當大德二年改授處州

路同知命下而公已捐館實是歲二月十有八日享年五十有四先大夫性孝友事兄賓州如父器物田宅賓州所予者猶辭不敢受嚴州遺宅二悉讓兄子淡嗜好自建康歸即獨處清坐嘗曰綺縠聲色非潤身延年佳物諸君何慕焉喜賓客終歲無虛日客去復具饌以俟不喜言人過或甚不能自重者猶覆護言無是事急施與家無長物嫁娶喪葬有不能舉者悉賑與之愛博而內明碩儒故官旁邑外郡俱館致教子弟嘗言吾交游

宜廣汎愛親仁勿為臧否可也有客素依公調官京師  
願奉公文書以效勞久之客得官羣議咎客公以書慰  
之君果有得猶我之得客出書示議者迺止善尺牘琴  
奕諸藝皆過人不自誼每言沽名激行為之良易然  
不可欺於心晚歲過郡土神祠桷侍行指謂曰吾言出  
諸口今得視神無愧自丙子來冠屨雜糅抑負不自振  
嘗開釋防漸而扶植之或利害不便必正色廣論絕其  
萌蘖迺止歿之日鄉里無貴賤老稚皆驚惋不絕莫在

鄞縣桃源鄉慈溪奥之原元配史氏太師丞相忠定史  
越王浩之曾孫祖彌堅資政殿學士贈太傅謚忠宣考  
賓之朝議大夫直敷文閣荆湖轉運副使再娶楊氏世  
儒家五世入太學景定壬戌太學進士太平州判官

之女以宋明堂恩俱贈安人男一楠史出女三長適

丞相史莊肅公嵩之孫似伯前將仕郎次適工部尚書  
余天任孫昌期前通仕郎次適資政殿大學士史巖之  
孫益伯前承務郎孫男二璫瑾孫女四長適同知餘姚

州事趙孟貫餘許嫁未行痛惟先大夫言履歷歷在人口耳蚤登膾仕將大有為迄不得展究尚義勇斷施止

於州里而中年泊然退靜莫有知其意者不肖孤藐然嗣承懼歲月之久失於傳貽將益負不孝願託于立言

大賢以求信于後世謹述歷官行事辱賜之銘而傳焉

先君子蚤承師友晚固艱貞習益之訓傳於過

庭述師友淵源錄

王鏞濟南人侍御史伯庠曾孫繇次翁始居鄆敦厚寡

言幼師之精理學多錄言行教人不喜矯飾壬戌進士  
張即之參政孝伯子孝祥從子善為頌語乾道淳熙事  
月日先後亡異史官李心傳嘗質之喜校書經史皆手  
定善本嚴州奉祠日相過從有絜疾語言清整待僮僕  
亦然書蔽其名書法之壞自張始特加太中大夫以壽  
終

趙汝楨善湘子為宰相婿卑退自修精易象有易叙叢  
書可傳官至戶部侍郎晚歲以理財進用失士譽

李伯玉鄱陽人為右司論事得罪後為禮部尚書薦以政事可作劇邑將入政府卒

馬光祖婺州人號吏師改署佐其府性過急斷決無停滯一時新進效之鄉有馬元演時為仁和縣晨坐解決事五百縣大治改官奏舉皆出馬公後為衢州坐殺饑民罷

劉震孫東平人忠肅公元孫文清公之子魏文靖公之壻為喬丞相行簡樞屬喬相與劉嘗言越公尸京政治

晚歲為宗正少卿兼中書舍人知為諸孫署刻曰嘉定  
名臣集有孫敏材宜理瘠縣

胡太初天台人以清苦自檢治興處州季鏞同其父越  
公門下士胡晚始自言事見劉克莊所為銘

劉黻永嘉人左史出治慶元于時奉祠山中以居鄉清  
修薦世號六士

汪之林里人龍圖閣學士大猷族孫為諸王宮教授守  
汀州晚歲十年不通時相書逮識樓宣獻公言出處大

致不可易居同里菴貧益甚卒

應文輝奉化縣人精史學年六十始入太學蚤游江淮吳毅甫作相兄淵守建康不去應作書諷之即謝事毅甫奇之招入相府不顧去史嵩之罷相猶子璟卿上書或言應為輔史相諷所屬掠治應益忿然卒得脫癸酉歲襄陽降應言世事已去先子官金陵戒母攜妻孥凡所言得失患中

曹說侍講粹中曾孫父為山陽佐死難幼絕董娶精易象數論語詩春秋皆有解多折衷舊說歲一再至易說

為里人所竊今不傳聞在松江儒家

王先生應麟兄弟中博學宏詞科為翰林學士禮部尚書咸淳詔冊辭命皆先生所作著書有春秋攷逸詩攷古易攷通鑑義例攷困學紀聞玉海一百卷文集一百卷先子命桷受業門下十年

胡三省天台人寶祐進士賈相館之釋通鑑三十年兵難藁三失乙酉歲留袁氏塾日手抄定註己丑冠作以書藏窖中得免定註今在家

吳浚建昌人喜論兵為建康參議數凌侮郡將賈相督  
師舟泊龍灣客謁不得入吳大慟賈竒之後入為王宮  
教授累遷起居舍人嘗薦先子于陳丞相入南起義兵  
事不濟議降文丞相殺之

戴表元辛未進士善論策失仕歸里力從諸先生能古  
文為金陵教授時與之同官家貧衣食喪葬咸賙之後  
留塾中有榆林集五十卷

黃震慈溪縣人以清介聞賈相知之守撫州兼本路提

點刑獄迄不能合坐論去性不喜鄉里獨作書以所為  
日抄一編寄贈

陳蒙鄆縣人國子司業墳之子善筆札治獄多探奇嘗  
疑之後為淮西總領以浪用公帑罷貶建昌晚守溫州  
夜別先子行益詭誕子孫散亡不可攷

安劉汴人居鄆之小溪以詩義冠多士善清言三歷祕  
丞郎官素為賈相客安以科目自持卒不得顯用

程鉅夫舊名文海郢州人今居建昌善鑒裁為侍御史

時奉詔徵江南遺逸首薦先予以疾辭所薦士皆知名  
多至大官今為翰林學士承旨

謝昌元資州人淳祐甲辰別院第一守封州提舉廣東  
常平幼歲見劉文節公光祖能道蜀士大夫言行可傳  
錄言蜀中亡事甚慄僑居于鄖入朝為禮部尚書

青陽夢炎西蜀人使李璮善機辯賈相愛之為荆湖提  
點刑獄仕元朝為吏部尚書多智

留夢炎三衢人事見國史晚為翰林承旨焚香擇吉日

薦先子于御史中丞翰林修撰汪漢卿與補官翰林時  
言之

趙與栗黃巖人篤實無城府睦姻族與先子俱為史壻  
官京師歲一遣問官至翰林學士卒

盛央金華人邃經學多本項安世氏丞相王爚薦為太  
學博士後通判慶元

梅應發廣德人與叔祖履道同補太學為慶元教授習  
詞科卒不成官至太府卿喜抄書先世書皆傳寫

舒岳祥台州寧海人七歲能作古文弱冠謁吳子良吏部大奇之吳學于陳耆卿舍人舍人學于葉適正則以師道自任好譏侮晚歲詩益工官慶元時與之游後作書俾桷往事之

劉莊孫學于舒能文詞深沉善精思家貧無書傳五經能默與先儒合病廢卒

樓櫟宣獻公族孫精歷法言宋司天氣朔盈虛當改章法不可用未之信後授時歷頒言始驗館于賓州伯父

家四十年日布筭疑多財者貧老卒

應發孫參知政事徽之子父為翰林學士時能代父書  
命後祕其父書不出好博以盡死

史蒙卿乙丑進士拙程文默誦五經其學喜奇說禮部  
尚書王公多傳授之卒以奇不合于王公

陳定孫參知政事卓之孫為軍器監家居四十年歲  
奉祭祀必哭泣年八十餘迺終

余尚賓官至太府寺丞賈相入朝不得調孝友誠實鄉

里交賢之

謝翹南劍人僧圓志瑞州人俱能古文尚嚴簡氣鬱不  
自舒困死

周密湖州人與陳厚韓翼甫李義山咸淳初為運司同  
僚俱有吏才約貴日以字稱禁近俗名號陳能文端明  
存之弟韓安陽裔孫善持守李豪邁名吏壽明之孫皆  
蚤卒周中丞祕曾孫晚歲以鑒賞游諸公微失雅道  
葛慶龍南康人寓居四明僧舍精唐律詩酒酣能飛筆

為數百言然棄不復錄有什一集極精警游越卒

先夫人行述

嗚呼桷始生之七日已不孝罹禍于先夫人音容永隔無所容罪每侍先大夫嘗語曰汝生之年歲大熱丙寅為火協于支干臨安居民繁湫坐地沃水猶喘息不得止茵席器案如執焦汝母體素弱一夕暴泄輒不可藥目光已離猶視汝在褓中復愀然曰桷來前念至是曷時可忘耶桷泣而記之又曰大父嚴州與汝外大父敷

文公最相好伏臘治具悉相似商榷品目議論好惡無一不脗合汝祖母王令人史太師甥孫故於敷文通姻好益密淳祐辛亥八月敷文病癥下嚴州日問疾敷文力疾言吾有二兒二女皆未姻願以婢女屬公幼子吾時年七歲汝母年六歲是月嚴州治幣問名閱七日敷文捐館嚴州歲時往敷文家撫汝母候算期以主我中饋又無祿嚴州即世景定辛酉歸于我史氏號大門伯父賓州嚴峻汝母屈意朝夕承候無替惰分至大祭盛

服俟廟門陳器薦牲饌低首偃立終日不少動性絜靜無華飾從母廣國夫人為昭化軍節度使謝公摯配貴家競侈異獨無纖粟摸效每一詣親黨歸悉脫去鉅屬嘗言教兒嬰孩必蚤加訓整庶無為父母羞余年少時習騎射必正色切劘或從廳屏偵問所與交有凡近者即掩被就睡明日徐曰先丞相家無此客先夫人少母張夫人所出張夫人生二女長適謝公先夫人既卒謝公日迎張夫人張夫人不肯去泣曰吾一外孫曷忍去

卒撫字見桷有室張夫人言外祖敷文方死時汝母坐床下泣不置勸之食不食終日坐殯次不離服除一詣庶母房至嫁日始再詣別之家人莫有識其顏面者桷既長舅氏軍器監丞柳州某言忠定越王淳熙中召赴德壽慶壽班孝宗曲宴問曰太傅幼子今何姻忠定謝不敢孝宗曰吾為太傅成之是時崇憲靖王伯圭女方笄即封新安郡主以嫁忠宣是生敷文敷文長外家出宰武康縣縣蒲始歸里敷文言吾祖暨外祖皆真太師

汝曹當謹擇婚對今甥已克堪問學慎毋忘外家敷文  
嘗言而母幼靜簡當有成竟迄不享年幸子在猶能慰  
吾意夫人諱棣卿字景華以宋明堂恩追封安人謹按  
史氏譜有舉八行者諱詔贈太師冀國公為五世祖曾  
大父諱浩舊學相孝宗純誠厚德歷三公以太師保寧  
軍節度使魏國公致仕追封越王謚忠定妣貝氏封齊  
魏國夫人伯祖諱彌遠相寧宗理宗太師中書令祖考  
諱彌堅資政殿學士光祿大夫奉化郡開國公致仕贈

太傅壯歲尹臨安帥湖南多異政中令為相歷年滋多  
太傅不復肯仕家居十餘年端平改元謚忠宣妣趙氏  
新安郡主封衛國夫人考諱賓之朝議大夫直敷文閣  
荆湖北路轉運副使少事丘文定公密以政事稱六為  
郡太守贈通奉大夫妣王氏恭人丞相忠定魯公淮之  
孫妣葉氏恭人俱贈碩人丙寅歲冬十一月葬于鄞縣  
通遠鄉建奥之原卒時年二十有一後三十有三年先  
處州不祿懼體魄之不寧遂別葬于桃源鄉慈溪奥之

原先處州諱洪朝列大夫同知處州路總管府事曾祖  
諱昇贈太師衛國公祖諱韶同知樞密院事資政殿大  
學士銀青光祿大夫奉化郡公致仕贈太師越國公父  
諱似道朝議大夫知嚴州贈中大夫男一人補女二人  
長適丞相莊肅史公嵩之孫伯伯前將仕郎次適工部  
尚書余天任孫昌期前通仕郎先大夫晚得女一人適  
資政殿大學士史巖之孫益伯前承務郎孫男二瓘瑾  
孫女四長適同知餘姚州事趙孟貫餘許嫁未行私念

桷孤苦不自振擢揆厥有生與先夫人違棄之日俱積  
今宰木已抱過庭之訓懼無以貽子孫敢求偉於文詞  
叙而銘之庶得以永考而有傳焉

亡妻鄭氏事狀

亡妻諱某姓鄭氏鄭為明州令族世家于鄭始自元祐  
舉進士至宣和時其孫入辟雍有諱某者當孝宗時為  
郎曹守平江寢著至太師尚書令忠定魏郡王諱清之  
以舊學相理宗官簿益盛故君之七世祖至高祖皆贈

太師魯國公魯公長子某國學進士贈中大夫妣邊氏  
封太碩人魯公配臧夫人素嚴忠定之生夫人將不舉  
邊氏亟詣姑取保乳之長歸于其姑後碩人生子諱某  
與忠定同登嘉定丁丑進士第邊碩人卒忠定為之服  
衰以報其子亦官至中大夫秘書監寶謨閣待制以終  
於君為祖贈正奉大夫妣汪氏封太碩人待制生子諱  
某朝請大夫直祕閣主管建昌軍僕都觀於君為考妣  
汪氏封宜人淳祐中忠定以師臣再相年益高祕閣入

閣承侍裨贊可否務總約體要纖秒不以類于時賈相  
帥京湖數張皇軍旅邊國用朝廷抑不下賈相恨議絲  
公出辛亥歲丞相薨庚申賈入相由是積二十有三年  
不復出仕先處州縣太社令奉祠里居祕閣公多能言  
臺閣舊事數往還是時祕閣新喪子無他嗣庚午歲迺  
得君客至嘗抱立左右錦襦珠鬟注目不聽去處州戲  
曰他日願以為子婦祕閣愀然若有屬矣酉歲處州通  
判建康府將之官宜人與祕閣餞飲于中堂共指桷曰

誠宜為吾婿是歲祕閣與宜人俱捐館居第在城東門  
外乙亥兵難作先處州以其遺言謀于其宗長始歸于  
我于時袁宗猶完盛先廟祭祀姊姒林立能卑順盡禮  
朔望承問無缺怠事桷外祖母張夫人甘柔涼燠調適  
以宜張夫人嚴整語相家內儀和珍組絲皆精巧有度  
君能耳受目悟而敬成之張夫人病革視藥膳連月不  
入寢處嘗曰新婦不獲事先姑得事夫人斯可矣性靜  
厚寡言笑遇事不輒發而是否瞭然不能易故處親黨

無間言處州幼撫如已女君貞顏色承事幾二十年絕  
纖粟忤意已丑城中災遺物散燬先處州以它事往吳  
杭間意忽忽不樂間治觴具能使如平盛時祕閣所後  
子不自振居深憂之竊從招提命所後子歲時以祀其  
先大德戊戌歲正月君產女病榮弱桶主史甥姻于杭  
二月十日丁卯亟歸視之則已不及矣大禍仍搆又八  
日而我先處州亦捐館舍噫念昔少時私欲奮勵學問  
以自振植先處州愛之迺悉總攬酬酢俾不以亂其心

不幸志昏能薄一無所成立四女二男皆君所出紩歲  
訓飭復能相其夫使有所不知及今一十有七年從宦  
京師藐然孤身若忘其家缺內佐之助靡密綜錯日益  
加多而學益以落文誠不能以表君之志敢求於故家  
之友人精於言詞者誌而銘之君墓在鄖縣桃源鄉潘  
奧之原男瓘次瑾女一嫁餘姚州同知趙孟貫餘許嫁  
未行桷今為翰林待制是為先樞密太師越公諱韶之  
第四曾孫先嚴州中大夫諱似道之嫡孫先處州朝列

諱洪之孤子也

外祖母張氏墓記

外祖母張氏諱致和湖州德清人嘉定六年七月生父某事趙崇憲靖王父子再世部樂伎年七歲通音律桶曾外祖母新安郡主歸崇王家見而愛之載以歸俾事外祖敷文轉運史公稍長為侍姬戶室靡密總覈合繩墨外祖性嚴急挈長匱短使不有忤意囊篋甲乙隨旨諭立陳于前如是踰三十年生二女長和政郡夫人嫁

太尉昭化軍節度使謝埜次即先妣會稽郡夫人歸于我先考諱洪朝列大夫處州路同知總管府事二女皆嫁宰輔家于時謝以后族貴顯先處州官臨安常卑讓疎之外祖母雖久居相門見謝婿侈靡踰限制心不樂而多留處州以靜恬自怡咸淳二年丙寅夏六月會稽夫人實生桷甫七日洞下遽卒又未幾先處州病大熱垂死咸言不利於母將及父謝公願取已育之處州在病搖手不許外祖母排斥詬詈戶之遂日訓飭調適且

祝曰兒宜為史氏外翁自重八年謝公死泣曰吾固審若是吾盡力撫袁氏外孫他何之訖見桶娶婦生女至元二十四年二月某日卒年七十有五葬于先夫人墓左五十武幼通書筭善心計處州事有未及始諷之終以舊事敷文者言之晚歲病瞽纏纏言外家事曰汝外曾祖太傅忠宣公居東湖滄洲十有四年不復仕作書諫兄忠獻辭相位不輒歲賜生日器幣辭一再始受後數年不復受鄭忠定丞相忠宣公塾師也敷文受學焉

其舊第前為舊學壽皇書後為授經鄭相書皆有深旨  
又曰音樂慎勿蓄今世公卿女樂皆俚野不足聽惟太  
傅婿趙崇王恩祖樂髓景祐譜調八十四穿心相通嘗  
曰譜與易合吾不知易何圖可合汝識之又曰丁抗掣  
曳大住小住為喉舌綱領法曲散序忠宣刪正之曲有  
均猶韻也纍纍貫珠韻不絕也聲有盡拍以度非句斷  
也于時周待制邦彥孫璿於太傅為中外表太師越忠  
定王嘗命譜清真詞手筆具在今付汝雖不解慎勿墜

也舊以恩賜紅霞被再封孺人記曰庶母不祀於孫而復曰祔于庶祖姑古不墓祭昔之大賢嘗愴然矣今夫禮緣於情而義以制者懼後之昵於私者之過也先王營丘壘之大小無貴賤慎其始不幸有沮洳崩齧之患焉其修之也必有道是則於吾外祖母非有過焉者矣以孤兒傳處州考其所自曰外祖母保鞠之恩重桷二子瓘瑾將竦然以加厚外祖母有田若干足以治墳壘奉春秋刻于碑陰懼瓘瑾之子若孫滅其情義必曰禮

有所不載遂具昔之訓撫行事立石于墓俾勿墜某年  
某月某日外孫具官袁桷謹誌





清容居士集卷三十三

欽定四庫全書

集部

清容居士集卷三十六

詳校官庶吉士臣張溥

侍讀臣孫球覆勘

總校官降調編修臣倉聖脉

校對官中書臣宋枋遠

謄錄監生臣鄧洪纘

欽定四庫全書

清容居士集卷三十四

元 袁桷 撰

傳

徐師顏傳

徐君諱師顏字子愚遠祖天聖間繇太末徙新定故所居里以氏得名曰徐門君始生時蓮出並蒂父母器之稍長讀經史心徹意領年十七授室君白大人當令兒

從師外方迺游三衢習進士業入宋太學程試甲乙表  
流輩性倜儻急難歲饑日具釜鬻滿庭廡值父喪慨曰  
世俗飯僧為冥福吾當活餓者以報親是歲就食者幾  
萬人太守楊潮南書以勵旁邑至元十四年詔用兵入  
南俘虜日繫馬尾疲弱棄道上春大疫饑民旁午君出  
粟募民鼻脣坎瘞可醫食者親撫視以活遇一女子扶  
曳蒼然氣微屬問之曰吾三衢儒家女命載以歸稍長  
俾為士人妻客方達可館于君死已飭斂具其子辭不

能行即指其地葬焉復嫁其孤女事繼母至孝一日妻治紓懈出微語君聞之自責不居內者幾月母言亡是叱妻具簪服拜堂下始復初外氏族黨嘗質田歲久君束券母前願奉田以償其承順率類此始為信州教授首言于郡復儒役七百人署所居曰道悅以奉母會母思歸即解去湖南缺提舉官集賢章舉之辭曰母在不宜遠遊受湖州迺歸秩滿視資當入縣佐君言昔為太學諸生中繩墨始得郡博士博士古官何縣佐為復授

太平路教授所至必先新學宮嚴餼廩安定胡先生墓  
浮屠氏將夷祀之居力復而致祀焉在太平時治丁蘭  
王祥諸祠墓於仁孝殆天性待諸生穆如也晚得末疾  
卒時年七十有四曾祖某祖某子男九人觀先卒頤為  
族弟仲龍後良革為長興州教授節處州路教授益晉  
萃復未仕女二方丙子時游騎入人居大索二女爭死  
之孫男二十人女三曾孫男女三人所著有上饒集吳  
興集姑熟集北游錄凡十卷大理卿陵陽年公序其詩

曰事親若徐積詩亦似之其子革留京師將歸泣言于袁桷曰先人力詩書宦不充其德遺行又泯遏弗表見革等何以自樹將乞銘于翰林學士廣平程公以表墓子為之傳藏于家其可乎迺弗敢辭贊曰

周官以鄉三物教萬民任恤之道戰國而降挾持以干莫幾於靡矣若徐君者不翕翕以近名禮以為防恬然孝謹彌老益安子孫滿門歿猶有稱旨哉

蕭御史家傳

公諱泰登字則平姓蕭氏遠祖縣唐末遷長沙占籍廬陵太和縣代有吉士曾祖諱逢辰官至中大夫當開慶間以安撫使副守鄉郡兵至卒急羣議撤近郊民居為清野大夫持議不下城守兵去里人德之晚歲築宅一區立田八百畝聚其族以教厚德衍裕生德安府觀察支使諱安中稱其先猷蚤歲以亡德安生中順大夫瓊州安撫副使諱元永玉雪矜謹倜儻自榮是生則平方幼時頭角嶄異九歲入鄉校治論語義屬筆精警稍長

忽自悟儒以道得名事物險易當品節中理齷齪翦翦  
無益也弱冠試吏調永豐丞永豐多盜區跡巢穴僇之  
丞以治稱入京師授湖南儒學副提舉振直士氣使治  
靡密者不敢撓部使者徐琰奇之言可為御史府屬會  
徐為中丞亟力言遂僉廣東道提刑按察司事廣東介  
絕嶺海幽篁深水蠻獠縱恣郡吏私表裏聲言獠不可  
治白日剽刦子女財物公贈遺良吏清謹者皆避讓郡  
縣多版授官姦宄馴積莫問使者循行擇善地坐歲月

即去至則躬厯所部勅治與獠相根蒂及積貪濫者八十七人皆罷之減始興貢銀之半疏其可宜行于臺者凡二十便事廣東民繇是知朝廷有犯贓律焉初至廣時謹言獠寇入境亦欲以是嘗試一坐大驚徐曰督盜守令職署舍在是卒有警我輩何自即上馬出境軍將爭率兵以進獠迺退是歲至元二十八年天子下議羣臣言按察官糜爛不任職更名曰肅政廉訪司遂以舊職解後新使者及御史咸言肅按察治事纔二百日所

論按皆引直當法不宜以舊官同罷牘甫上御史大夫  
書牘曰湏選用元貞改元成宗即位罷兵安南釋陪臣  
陶子奇歸命李衍為禮部侍郎奉詔往使之遂拜兵部  
郎中介其事明年二月入安南世子遣僞署官曰太尉  
迎詔空首不至地因問何得爾僞太尉曰國世子未至  
不敢先以黃蓋二皂衣數十人清路入館世子髡首跣  
足率從吏百餘人至館門前問聖天子起居却立曰主  
上新即大位二使者辱入敝境道里勞遠秋毫無所取

誠切感忭敢昧死願聞明詔大意侍郎中郎中前  
曰昔迺先王先諸蠻款附朝廷錄舊功將錫宥于汝小  
邦汝曷敢不祗畏克敬迺不墜厥命或少縱自恣天  
憲速罰弗敢逭宜肅恭盡事世子錯愕唯唯越三日備  
仗奉綵輿率朝服數十人導詔從褥道中行入其宮世  
子後從二使者授詔世子拜伏讀詔興稽顙曰小臣不  
自意獲寬大如是復命再拜遂定慰賀皇帝皇太后皇  
后表牋貢物儀注成禮迺還道縣思明時思明帥言石

西州祿州皆本朝地為安南所侵幾二百里彼詭言山  
溪蠻阮盡出沒不相統虛文歲往來無益至永平寨寨  
故宋戍兵遮道言寶安南部領侵撓不得耕耨回首語  
陶子奇山溪蠻誠所屬奚號令不可止今已目覩當語  
而世子子奇不能對至是復命歸地蠻吏上下顧客遂  
言吾非以侵疆來石西地不足輕重設奉辭致討汝何  
以自洗各屏息一口盡歸侵地故右丞相太傅公時治  
湖廣省聞復地亟喜之為設宴以勞凡安南所贈遺忠

返之明年遷連州又明年改為江西儒學提舉儒者用  
廢已久新舊持短長科舉律令交排鄙不中節至則擇  
知名士禮致之導誘後生斟酌可能行者為繩準省檄  
慮因有巡官及富民殺人誘傭奴以財俾自誣伏獄屢  
閑無異詞徐跡處所及所持刃亡有獨引囚曰若是汝  
當死咸欵實得出會詔使按問諸道守令治狀使四丞  
相問官吏孰廉使以儒學官蕭泰登對四年僉嶺南廣  
西道廉訪司事海南都元帥薛闡干聲敶震海上多所

為姦利不法立具章劾有詔雜治抵罪斃殺無罪七人  
焚掠村堡二十四奪私沒奴婢六百七十五雜畜三千  
六百五十五過柳州出妖民誣詐者百三十七凡黜吏  
二百一十罷攝吏四十六年進奉直大夫江南行臺  
監察御史分守江浙行省會歲大饑吳流民扶曳滿道  
已定議出官粟守法吏言非朝旨不得擅語曰民命在  
旦夕後有詰責已捐貲以償何害為行省吏牘積糧叢  
雜首尾銜絡搖手莫敢問時已得疾呼掾史詰難視罪

輕重悉坐之又別為副書筆其事使後母有出入犀吏  
大驚是歲八月疾漸革趣治棺歛手書屬其子語侍疾  
者勿宜受贈賄遂登舟不復言卒時年三十有八歸葬  
于其鄉螺岡門外配楊氏繼彭氏子男三文孫憲孫昇  
孫女三大夫天性明爽閱具獄率不為吏蔽探情傳意  
多所出活非曲假恩貸以自異重然諾容采精絢達官  
大人皆傾耳與論事或言太剛必折徐正色曰今世士  
無有剛果折何憂也長子文孫靜專自修留京師授翰

林學士程公銘俾為家傳念與公同年生相後纔一  
月蕭薄不自振然職在太史筆削傳信惟謹迺弗辭  
贊曰

大江以南號多公卿比數十年閭焉無聞者何邪官御  
史府斬斬五六人或以激毀或以慎譏獨蕭公精謹自  
持正靜益明物莫能逃守儒知通据法不阿使參錯天  
下三年可成也年不行用名益以昌何恨焉

史母程氏傳

嗚呼余嘗得三卯錄讀之蜀禍之慘不忍言也夫朱襋  
孫之死而復生也蜀民就死率五十人為一聚以刀悉  
刺之迺積其屍至暮疑不死復刺之襋孫屍積於下暮  
刺者偶不及屍血淋漓入襋孫口夜半始糲匍匐入林  
薄匿他所後出蜀為樞密使嘗袒視人未嘗不泣下賀  
靖權成都錄城中骸骨一百四十萬城外者不計嗚呼  
推是考蓋可悲也蜀眉州史氏由唐吏部侍郎儼從僖  
宗幸蜀因家焉其先墓在青神將二十世宋世號名族

其出蜀也今唯居湖州一房讀其遺事益悲之史母程夫人蘇文忠公之母之族也夫人將攜其家下峽江以橐金腰纏之兵暴至伏林莽與鄰嫗謀曰輸金果可生吾兒無資不復能出蜀史宗誠無噍類矣縱得生旦夕兵復至亦決死均死死以全史兒誠不恨嫗見身死為吾出腰中金告兒使速走須臾兵果執母謝以寶亡金遂遇害翼日嫗語于鄰告史氏兒兒年甫十三從草野得尸如其言空以歸且亟圖其象識曰史光母年五十

有四嘉熙二年十月二十有七日申時死兵難兒遂東  
南來占籍湖州刻意自奮以右科為浙東兵馬鈐轄鈐  
轄生子圭文嘉定儒學教授嘉定生子台孫某台孫儒  
術通吏文復有子幾人而史氏繇嘉熙至于今且四傳  
矣噫蜀繇秦帝入中夏至于宋凡一千五百餘年文物  
大盛絕不知有兵革一旦掃削殆盡迄今百餘年遺墟  
敗棘郡縣降廢幾半可哀也已可哀也已贊曰

婦人內德不出門房中歌廢戰國而下俱不幸以著非

得已也諱莫甚於死從容反復烈士猶難之况士女乎  
歐陽公傳斷臂婦人以愧馮道夫人以死傳宗承平世  
澤於是乎見作史者烏得廢諸延祐七年十月壬子前  
史官會稽袁桷撰

孫孝子傳

表厥宅里首於唐虞若是則失其本心者見於上古歟  
司馬遷傳貨殖滑稽或者譏其有激五典為治之本捨  
正而求異於世道何補焉晉唐作史始立孝友勸勵後

世靡然嚮風深有取焉孫孝子楫字濟川世為保定雄  
州新城人幼倜儻讀書通大義其喪父也遵禮而不瀆  
後調宣德尹慨然曰吾惟母存何仕為不踰月謝去事  
母以上壽終而歸于田野者凡十七年兄蚤喪奉嫂彌  
謹卒為兄子授室姊贊李氏于家三十年將異居營近  
市高燥以奉姊姊大慰喜錄其孤有成性重然諾不自  
表襮有故人喪至日將葬適以故不及送抵暮促騎以  
往夜已分一家大驚其待友也有桂劍之義焉其居鄉

隱約自持鄉多宦家絕不通問鄉人咸曰此孫孝子居也卒上其行于朝表其門閭始為燕南府史錄事襄陽繼授宣德縣宣德名始著調興和路經歷改河東憲府屬又調濟南卒拜監察御史今為浙東道廉訪僉事其行事不阿多可紀余獨著其孝行於父母兄姊朋友兼盡故特書太原郭幹卿嘗曰孫濟川少歲能以其妻奩物償父兄逋一難能兄無子買妾以奉二難能郭斬許可今考其行信然前史官表稱曰曩在史院時嘗纂次

世祖以來功臣列傳考實錄所著旌表令尤諄切至作  
隱逸孝行訖未有章灼篤實可以詔後世若孫孝子先  
其人哉

韓威敏公家傳

公諱政字君用姓韓氏高祖諱天麟知金臨潢府有惠  
政民祠奉之卒葬城南因家焉曾祖諱垂高州節度妣  
李氏祖文卿知耀州妣孫氏貞祐避兵南遷臨淄今為  
益都人父松之膂力善戰四騎馬募兵南征與之俱至

下郡主將奇其勇俾率益都兵戍山陽戊子歲攻宋揚  
州歿于陣公時年五歲妣劉氏挈以家山陽明年益都  
為皇元所破淮南城守爭遁去劉氏走奔莒居烽火山  
劉母家沂州其舅業醫命習之盡得其術復遇一醫繇  
是益精稍長猶隱醫以自活山東連歲大擾入于汴復  
歸臨朐又復還青社時甫弱冠見叔父順始得拜淄州  
諸營迺復從軍取海州掠東海破漣水皆在功簿塔察  
大王鎮遼東名公以從至于龍庭與議事不合卒以其

嘗所計畫者告于世祖皇帝遂悉以邊陲大事委之至元十三年討西羌相威國王領兵即授嘉議大夫漢軍元帥監軍事佩金虎符軍中大驚曰監軍非國姓不得領裕宗在東宮心亦疑會入辭命以鎮庫弓挽之彀而復引者三始曰大帝善任使若是賜金錦衣一以行西入大磧斬馘凱聞還軍至臨潢得拜祖墓其碑記猶在十五年立五衛首授前衛親軍副都元帥指揮使復兼領左右衛屯田軍馬紀律整遏卒莫敢譁奏以屯田各

歸于衛而治其無良者則諸衛各有統屬上從之秋繕修大明殿以治具稱十九年加正議大夫充樞密院判官二十年進治書侍御史二十三年改淮東道按察使善決事有拾遺者告于其所失輒誣以金公遺拾遺者而叱去之商人暴死于旅邸疑邸人殺之驗其嗜炎有毒邸人得釋其餘行事往往與傳記相合常出能吏上薦士十三人率致位通顯在御史府定議盧右丞牟利罪卒流徙之二十六年卒于官年六十有六葬于某鄉

贈嘉議大夫

開

部尚書上輕車都尉南陽郡侯謚威敏

娶孫氏袁氏石氏殷氏男八拱承務郎廣州路增城縣

尹次振搏奉政大夫慶元路昌國知州極御藥院副使

次撝皆蚤卒次揆扶持女十人孫男若干人搏之治昌

國也興儒學建三皇祠嘗紀其美績且命作家傳讀其

隧碑襲慶趾嫋有自来矣贊曰

貞祐兵興中原士人無噍類獨臨潢以遺愛祠墓茲土

三世牧守至於曾孫死事有光威敏是承北省臨潢南

保臨淄難矣哉政合古先不茹不吐子孫繩繩宜哉

有元開府儀同三司上卿輔成贊化保運玄教

大宗師張公家傳

公諱留孫字師漢系出清河東武城張氏留侯良之裔  
孫歆為司徒歆弟協為衛尉生魏太山太守岱自河內  
徙清河七代孫彝徙魏州昌樂為後魏侍中謚孝侯子  
始均復謚孝侯孝侯生晏之北齊兗州刺史生虔雄為  
隋陽城令是生文瓘相唐高宗子潛揚州刺史揚州生

宋為杭州刺史始居江南至公十五世今為信州貴溪  
縣人曾祖宏綱集賢大學士光祿大夫柱國魏國公謚  
安惠祖粹夫金紫光祿大夫大司徒上柱國魏國公謚  
康穆皆以公貴贈父九德太中大夫同知江東道宣慰  
使司事累贈開府儀同三司大司徒上柱國魏國公謚  
文簡公早聞詩學道龍虎山見而慕之遂服道士服以  
漢天師所傳授游江淮間儀觀頗整見者尊異咸願受  
其說有相者曰當貴極人臣而清奇絕俗視陶弘景葉

法靜殆將過之世祖皇帝平江南召嗣天師宗演選公  
從行北方地高寒皆不樂居中遂委任其事門室清泊  
處之晏如也世祖祠幄殿裕宗入侍風雨卒至召見于  
上見其貌異常士而奏對簡異益器之風雨隨止遂賜  
廩給裘服俾歲從北巡上與昭睿順聖皇后駐日月山  
后疾甚召至命愈其疾若有神人獻夢于后遂愈上大  
喜命為上卿鑄寶劒鏤其文曰大元賜張上卿敕兩都  
各建崇真宮朝夕從駕日昃命衛士提輿以歸內侍強

登輿謝不受即步出禁門十五年加玄教宗師授道教  
都提點管領江北淮東淮西荆襄道教事佩銀印明年  
奏復宮觀令自別為籍有獻言者道藏經多穀雜宜焚  
去不錄遂密啟裕宗黃老書漢帝遵守清淨嘗以治天  
下非臣敢私言願殿下敷奏後上大悟召翰林集賢議  
定上章祠祭等儀注訖行于世十七年奉詔祠名山川  
給驛馬五十令訪遺逸以進敕輔臣設宴崇真宮復錢  
于國南門外回朝以所見聞刻于上上悉用之十八年

七月皇曾孫生是為武宗上命擇嘉名以進是歲分翰  
林集賢院為兩道教專掌集賢始自公議二十二年仁  
宗生復名命名今二帝廟諱雖用國語皆以公名義釋  
之二十五年預議集賢院賜七寶冠金錦衣玉珊瑚履  
二十八年丞相桑哥敗上欲相完澤穆卜之得同人之  
豫公曰同人柔得位而應乎乾豫利建侯同人為得位  
豫為建侯彖傳之辭也陛下所擬為無疑未幾拜完澤  
公為相後卒受遺輔政二十九年開通惠河上問果便

利對曰漕為國本孰敢議非是誠減民力取實效民必  
趨之繇是河役卒不為民病三十一年上不豫遣內侍  
諭隆福太后曰張上卿朕舊臣必能善事太子太子繇  
軍中歸即帝位是為成宗皇帝成宗慕道家說歲祀彌  
盛在宥十年歲輒祠上帝侈甚祕祝御名皆上所自署  
後有白鶲翔雲中命詞臣叙紀付史館元貞元年同知  
集賢院道教事大德三年加大宗師別給銀印視二品  
上御便殿命講南華經七年上京旱兩京山西地震復

命祠祝謝曰祠祝實臣職祭不欲數地道主靜厥罰惟  
賜見於五行傳災繇人興願應天以實布德賑惠臣敢  
稽首以請上深領之八年上御玉德殿賜玉冠為壽十  
年制授上卿十一年與聖皇太后自懷孟還宮武宗即  
位加大真人知集賢院事至大二年領集賢院位大學  
士上是歲再加特進時仁宗在東宮進講老子自是入  
侍必賜坐皇慶元年錫號輔成贊化二年命將作臣製  
玉刻文曰玄教大宗師手授曰以是傳教俾永遠延祐

二年羣臣侍嘉禧殿上曰先朝備陟降持保無瑕缺者  
孰在咸未有對上語曰張上卿其人乎衆唯唯遂制授  
開府儀同三司號加保運四年以七十特敕設于其宮  
伎部畢列宰輔以下咸奉壽復命圖像鎮崇真宮賜璽  
文曰皇帝之寶命翰林學士承旨趙孟頫為贊兩宮傳  
賜翌日入謝俛奏曰臣際遇累朝惕惕顧念固有替今  
年且衰耄不去辱聖世願歸老鄉里即死且不朽上不  
允七年英宗皇帝即位遵累聖優褒禮再降璽書至治

元年益求去十二月壬子酌酒會弟子少頃入寢室修  
靜端坐以化歟之日顏色完好舉體如蛻羽兩宮震悼  
贈有加宰輔至于士類咸曰福人逝矣傾城耄稚則  
曰善人亡矣皆弔哭盡哀及啟輶木冰載路觀者嗟愕  
始從日月山世祖即命公為天師却立以謝曰嗣天師  
漢張陵之裔今居龍虎山願正其傳繇自三十六代嗣  
師宗演至于今凡四傳皆公所匡翊美鬚長大癯然冲  
退不擇貴賤傾下承接奏告廣殿音聲激鏞鐘聞者凜

竦賚錫無虛歲未嘗奉已屢錫田園以食其徒當至元  
末歲成宗新嗣位時宰不快於御史臺成宗是其言讓  
責中丞崔公或崔懼問策安在曰當見丞相釋所以遂  
與俱詣相府相怒霄又與同謁近臣言御史臺世祖皇  
帝建立專以懲姦媚勢尊則綱紀明削之則臺不能立  
矣近臣大驚入言於上明日大宴大明殿諭崔曰臺為  
朕耳目朕曷不知憂卿等不職故告諭宜勿懼其盡心  
焉朕行為汝增重矣崔頓首拜手謝其彌縫國體婉順

若是至於排解薦助人不知所自亦不肯自以為功絕  
口不言朝政貴客至爭短長酒盡三爵即假寐客去禮  
復初暨喪還州郡縣接祭以俟今葬某縣某鄉祖師八  
人皆贈真人事在傳宗碑今嗣玄教為吳全節授特進  
上卿玄教宗師崇文弘道玄德真人以真人佩銀印者  
三人夏文淩江淮荆襄等處道教都提點曰毛頴達掌  
道教事曰王壽衍領杭州開元宮以真人制書命者三  
曰余以誠領鎮江路諸宮觀曰孫益謙領杭州佑聖觀

延祥觀曰陳日新承詔興聖宮以璽書命者九曰何恩  
榮提點信州真慶宮曰李奕芳提點南嶽廟魚衡山昭  
聖宮壽寧宮曰張嗣房提點潭州嶽麓宮曰薛廷鳳舒  
致祥張德隆薛玄義徐天麟丁應松皆奉兩宮崇真祠  
事其他弟子三十有八曰上官與齡何斯可彭齊年薛  
起東李世昌陳彥倫詹處敬于有興王景平蔡仲哲彭  
堯臣張汝翼馮瑞京祝永慶蔡允中張善式董襲常王  
國賓曹載靜余克剛丁迪吉張居遜董宇定王用亨張

顯良徐守勤彭一寧劉若冲彭師尹張逢吉趙有立程  
某施某葉某童某倪某上官某李某公兄子榮祖弟子  
熙祖亦以公故入宿衛榮祖為邵武路同知熙祖為衢  
州路同知泰定二年今上召全節曰玄教汝祖闡立其  
為朕祈永遂大祠於長春復追贈某官前史官贊曰

世祖皇帝闔一海宇蒐遺逸選藝能靡然踵來江南持  
政柄者不一二人卒不能善終何哉在御三十四年命  
相幾二十餘人或解罷或斥逐獨張公無少疵病目覩

成敗至於五朝難矣哉蓋其行無迹曲焉以全得老氏  
之旨五福斯備前古鮮著詩云昭明有融高朗令終張  
公其近之

拜住元帥出使事實

至元二十九年今浙東元帥拜住公奉世祖旨以行軍  
招安使從征爪哇于時高王二將為蠻兵所圍公深入  
拔圍出之元貞二年奉成宗旨使西域哈贊王愛其才  
以尚衣職行軍有戰功賞金符金帶因令其入見於成

宗復賜虎符皇慶二年仁宗以金印賜丞相李羅且俾  
往哈兒班答王所議事至中途遇也先不花王疑有間  
謀執以問答曰今上所遣不過通歲時間禮曷有他意  
王左右曰使者往奉旨言有啟邊生事形迹汝此行宜  
得要領可實言否則榜掠汝亦必言遂命跪大雪以問  
且搜其衣中無所有公曰王所問實不知且王從何所  
得是議王曰阿必失哈至是嘗言之且曰哈兒班答王  
上近支也吾等族屬存與留不可知後使者至必有處分

今汝往彼必生事速吐情以告我曰王擁兵遮道使者急求去多詭辭以脫阿必失哈曷可信左右曰彼統軍九萬寧肯不自愛惜詐言以求脫遂縛公兩手納諸股擊之迺曰有璽書具在使臣往來有後先拜住萬死實不知取璽書視之始曰彼果無罪遂奪其虎符及丞相金印拘囚王所延祐元年五興兵內寇復遣使召公至獵所曰我已入汝境土矣公曰兄弟之國無内外彼地亦王地王往何所疑王曰親疎既分釁隙已兆勢不得

不爾公徐言在昔太祖皇帝西征有訓若曰人不可以  
信讒讒入則宗親乖離宗親既離則百姓他適將貽笑  
於敵國拜住嘗聞在成宗時先王有盟與滅國開闢塞  
以安百姓今言猶未泯絕使者掉舌生異同令王致疑  
拜住等良不稱職敢叩頭死罪以請王解頰曰吾欲遣  
汝詣上通好何如公謝不能時有不內附者梗於路遂  
罷行復以公往昔拘所未幾王薨延祐七年弟怯別王  
立王名曰在昔先王嘗遣汝詣上前後不果汝今宜以

素所具奏者以聞是年秋入朝上曰太祖造邦孔艱惟和好惇叙則宗支允寧汝其以元帥職名乘驛諭朕意王既受上旨拊膺謝曰疆宇寧敷自此始汝來何遲也對曰使副有疾在道故不得速進王曰來旨極善使他人來吾亦不若是深信大較使臣多擅增減致啟邊禍公曰拜住來途中聆逃人言且云復將有兵變拜住實不信懼王惑其言而行人之言不得信於上是為虛行王宜熟察善計慮拜住不敢他引古事為比維昔定宗

皇帝征把堯王有滅國真薛禪使者諫罷征嘗喻太祖  
得國之本明配日月量侔江海合天地之大德故能混  
一海宇滅國真薛禪死已久拜住不才願踵其策以獻  
後王從公言奏於上訖如約以平王遂遣使收兵四境  
而少尼其行且曰邇者猝遇將害汝遂設宴三日給符  
信護行俾歸於朝至治元年三月抵上京入見於上而  
王亦遣使奏拜住兩為行人不愛其身隆爵厚職所不  
吝然除拜非吾所預為語朝廷大臣善奏於上使得享

至樂建牙纛為諸侯表得矣是年冬丞相拜往入奏嘉  
禧殿具以功簿言迺拜中奉大夫浙東道宣慰使都元  
帥官既滿類集行事俾桷為奉使事實云前史官袁桷  
曰

太祖皇帝經畫區夏以磐石宗犬牙於龍興絕域之地  
四履奠安盛矣夫疆域既廣詔旨上意傳諭失實則時  
致疑爭拜往公間闢險阻百懷不撓義正功倍以數百  
語解百萬之師非精白一心曷底於是計勲上多卒稱

其職俾後之為人臣者益有勸焉

清容居士集卷三十四